

Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut
(Ineqarnermut, Attaveqarnermut Angallanermullu Naalakkersuisoq)

Saqqummiussineq

Siullermeerneqarnera

Rigsombudip Imarsiornermut Aqutsisoqarfik sinnerlugu imarsiornerup isumannaatsuunissaa pillugu inatsimmut allannguutit Kalaallit Nunaannut atuutsinneqalernissaannut peqqussut nassiuppa. Peqqussutip atuutilerneratigut imarsiornerup isumannaatsuunissaa pillugu inatsimmi allannguutit tallimat kingulliit Kalaallit Nunaannut atuutsinneqalissapput.

Peqqussut allannguutissatut siunnersuutiniq arlalinnik imaqarpoq, taakkunanngalu marluk Kalaallit Nunaannut immikkut soqutiginaateqarput.

Siullermik inatsit inatsisitigut tunngavissatut aalajangersakkanik ataasiakkaanik, pingaartumik aalisariutini isumannaatsuunerup nukittorsarneqarinnissaanik, taakkununngalu ilanngullugu aalisariutiniq misissuisarnermi akiliisarnermut maleruagassanik allannguinnissamik siunnerfeqartunik imaqarpoq.

Aappaattut Kalaallit Nunaata imartaani danskit imartaannut sanilliullugu imigassartorsimalluni angalanermut maleruagassanik sukannernerusunik atuutsitsilersinnaaneq periarfissinneqassaaq. Taamaalilluni aammattaaq angallatit sunngiffimmi atornerqartartut, angissusii apeqqutaatinnagit promillinut killiliussanut aalajangersimasunut ilaatinneqalerlutik maleruagassiortoqarsinnaalissaaq; taamatullu promillinut killiliussat angallammi ilaasunut tamanut atuutinneqalernissaannik aalajangersaasoqarsinnaalissaaq. 2008-mi imigassartorsimalluni imaatigut angalasarnermut maleruagassat Kalaallit Nunaannut atuutsinneqalermata, tamanna taamani Naalakkersuisuusunit annertuumik kissaatigineqalerpoq, tamatumalu kingorna inatsisinut allannguutissaaq taannarpiaq atuutsilerniarlugu sulineq ingerlasimavoq.

Peqqussutissaaq Imarsiornermut Ataatsimiititaliamut, Peqqissutsimut Naalakkersuisoqarfimmut, Aalisarnermut, Piniarnermut Nunalerinermullu Naalakkersuisoqarfimmut, Aningaasaqarnermut Naalakkersuisoqarfimmut, Ineqarnermut, Attaveqarnermut Angallanermullu Naalakkersuisoqarfimmut kommuninullu tusarniaassutigineqarpoq. Tassani erseqqissassallugu pingaaruteqarpoq, allannguinerit taamaattut atuutsinneqalissappata, tamanna Namminersorlutik Oqartussat aamma Imarsiornermut Aqutsisoqarfiup akornanni suleqatigiinnikkut pisussaasoq. Taamaattumik peqqussut imminermi aalisarnermik inuussutissarsiuteqarnermi aningaasartuutit amerlinerinik nassataqassanngilaq.

Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.